



ANG

Bayan

Pahayagan ng Partido Komunista ng Pilipinas
Pinapatnubayan ng Marxismo-Leninismo-Maoismo

Taon XLI Blg. 21
Nobyembre 7, 2010
www.philippinerevolution.org

Editorial

Baklasin ang mga balakid sa usapang pangkapayapaan

Apat na buwan mula nang maluklok ito, nabuo na rin ng rehimeng Aquino ang panel para sa pakikipag-usapang kapayapaan sa National Democratic Front of the Philippines (NDFP). Kabilang sa hinirang ni Aquino ang mga personaheng kinikilalang tunay na interesado sa prosesong pangkapayapaan.

Ito na ang unang positibong hakbang tungo sa muling pagbubukas ng matagal nang nauntol at nabahurang usapan. Sa kabilang panig, ilang buwan na mula nang ipahayag ng NDFP ang kahandaan nitong harapin sa usapang pangkapayapaan ang rehimeng Aquino oras na magpakita ito ng kaseryosohan dito.

Inaasahang muling masisimulan ang mga pag-uusap sa bungad ng 2011.

Subalit higit pa ang mga hamon sa pagtutol ng usapang pangkapayapaan. Marami pang dapat ayusin para umusad ito nang maayos. Pangunahin dito ang pangangailangang alisin ng GRP ang mga itinayo nitong balakid na sumasagka sa muling pagbubukas ng pormal na pag-uusap.


Higit sa paghirang ng kanyang mga sugo, kailangang ipakita ni Aquino ang kaseryosohan sa pag-uusap sa pamamagitan ng pagtataguyod at paggalang sa mga dati nang

kasunduang pinirmahan ng NDFP at GRP. Dapat niyang pawiin ang lahat ng mga naging hakbang ng dating rehimen na naging mapangwasak sa usapang pangkapayapaan.

Dapat kilalanin at mahigpit na itaguyod ang Joint Agreement on Safety and Immunity Guarantees (JASIG) na siyang nagbibigay-proteksyon sa mga konsultant at istap ng magkabilang panig na sangkot sa negosasyon. Makailang ulit itong nilapastangan ng rehimeng Arroyo sa pag-atake sa mga konsultant at istap ng NDFP.

Humihingi ng katarungan ang mga kaso ng pagdukot sa mga tauhan ng NDFP na sina Leo Velasco, Prudencio Calubid at Rogelio Calubad at iba pa. Dapat nang agad mapalaya ang anim pang nakakulong. Ang mandamyento de aresto laban kina Ka Luis Jalandoni, tagapangulo ng *negotiating panel* ng NDFP at Ka Jose Ma. Sison, punong pampulitikang konsultant ng NDFP at iba pang sinampahan ng gawa-gawang mga kasong kriminal ay nakasagka sa malaya nilang paglahok sa usapang pangkapayapaan.

Hangga't walang malinaw na pahayag ang GRP tungkol sa pagtalima nito sa JASIG, nasa alanganin ang planong pag-uwi sa



Mga tampok sa isyung ito...

Sabwatang Akbayan at rehimeng US-Aquino
PAHINA 3

Pagtutol sa pagmimina, lumalawak
PAHINA 7

Pagpapatanim ng kasaba ng Cojuangco-SMC
PAHINA 8

Pilipinas ni Jalandoni sa Disyembre para sana maglunsad ng mga konsultasyon sa mga rebolusyonaryong pwersa at iba pang mga sektor.

Ilang ulit na tinalikuran ng rehimeng Arroyo ang mga kasunduan sa pagpapalaya ng lahat ng iba pang bilanggong pulitikal. Dapat itong iwasto ng rehimeng Aquino sa pamamagitan ng pagpapalaya sa Morong 43 at mahigit 300 iba pang bilanggong pulitikal na nagdurusa sa iba't ibang piitan at kampo militar sa buong bansa. Tumitingkad ang halaga ng gayong hakbang sa harap ng pag-utos ni Aquino ng pagpapalaya sa halos 400 nakakulong na rebeldeng militar, gayundin sa harap ng pagkumenda niya sa mahigit 15 taon nang pagkukulong ng diktadurang militar sa Myanmar sa pangunahing kritiko nito na si Aung San Suu Kyi.

Dapat ding palargahin ang gawain ng Joint Monitoring Committee (JMC) na sumusubaybay sa mga paglabag sa unang sustantibong kasunduan—ang Comprehensive Agreement on Respect for Human Rights and International Humanitarian Law (CARHRIHL). Lansakan ang mga paglabag dito ng mga armadong pwersa ng GRP. Wala pang

10-puntong panukalang kasunduan

- 1 Itayo ang malinis at matapat na gubyernong koalisyong para sa tunay na pambansang kalayaan at demokrasya at laban sa imperyalistang dominasyon at kontrol.
- 2 Igalang ang mga demokratikong karapatan ng masang anakpawis at bigyan sila ng sapat na representasyon sa gubyernong koalisyong.
- 3 Ipatupad ang pambansang industriyalisasyon at reporma sa lupa at tutulan ang imperyalistang pandarambong at korapsyon sa militar at burukrasya.
- 4 Kanselahin ang utang panlabas at bawasan ang inilalaang badyet para sa militar at iba pang armadong organisasyon ng GRP.
- 5 Itaguyod ang patriyotiko, syentipiko at makamasang kultura.
- 6 Igalang ang karapatan sa pagpapasya-sa-sarili ng mga pambansang minorya.
- 7 Imbestigahan at litisin ang mga upisyal ng gubyerno na may mga kasong pagtataksil sa bayan, korapsyon at paglabag sa karapatang-tao.
- 8 Ipatupad ang tunay na nagsasariling patakarang panlabas.
- 9 Magmantini ng relasyong pangkalakalan at diplomatiko sa iba pang bansa sa ASEAN, China, South at North Korea, Japan at Russia.
- 10 Ipatupad ang tigil-putukan sa pagitan ng mga armadong pwersa ng GRP at NDFP.

ipinakilala si Aquino na seryosong pagtataguyod sa karapatang-tao.

Wala pa ring lubay ang madugong kampanyang militar at terorismo kontra sa mamamayan. Maipapakita ni Aquino ang kagandahang-loob para sa usapan kung iuutos niya ang pagpapatigil sa malulupit na operasyong militar, ekstrahudisyal na pamamaslang, pagdukot, pagtortur at panggigipit sa mga aktibista at masa at iba pang pasistang gawain ng militar at pwersang panseguridad ng GRP.

Hindi pa rin naipatutupad hanggang ngayon ang probisyon sa CARHRIHL na pagbibigay ng dan-yos sa mga biktima ng paglabag sa karapatang-tao sa ilalim ng diktadurang Marcos.

Dapat ding mapagpasyang humakbang si Aquino para iwaksi ang dating pakikipagkutsabahan ng rehimeng Arroyo sa imperyalismong



Taon XLI Blg. 21 Nobyembre 7, 2010

Ang *Ang Bayan* ay inilalabas sa wikang Pilipino, Bisaya, Iloko, Hiligaynon, Waray at Ingles.

Maaari itong i-download mula sa Philippine Revolution Web Central na matatagpuan sa:

www.philippinerevolution.net

Tumatanggap ang *Ang Bayan* ng mga kontribusyon sa anyo ng mga artikulo at balita. Hinihikayat din ang mga mambabasa na magpaabot ng mga puna at rekomendasyon sa ikauunlad ng ating pahayagan. Maaabot kami sa pamamagitan ng email sa: angbayan@yahoo.com

Nilalaman

Editorial	1
10-puntong panukalang kasunduan	2
Akbayan at ang rehimeng Aquino	3
Bahagi ng programang COIN	4
Akbayan at rehimeng US-Arroyo	4
Limos, hindi lunas sa kahirapan	5
Matatagumpay na opensiba ng BHB	
41st IB, hinambalos ng BHB	5
Pananalanta ng pasistang estado	6
Pagtutol sa pagmimina, lumalawak	7
Pagpapatanim ng kasaba ng Cojuangco-SMC	8
ILPS, sumusuporta sa welga ng mga anakpawis sa France	10
Balita	11

Ang *Ang Bayan* ay inilalathala dalawang beses bawat buwan ng Komite Sentral ng Partido Komunista ng Pilipinas

US upang isama ang Partido Komunista ng Pilipinas, Bagong Hukbong Bayan at punong pampulitika ng NDFP sa “talaan ng mga teroristang” minamanti ni ng US, European Union at iba pang imperyalistang bansa. Naki-pagkasundo ang GRP noong 2004 na gagawa ito ng mga pampulitika, diplomatiko at iba pang hakbang para bawiin ito pero wala pang anumang hakbanging naisasagawa.

Dapat ding tupdin ni Aquino ang The Hague Joint Declaration of 1992 na naglatag ng mga prinsip-yong gumagabay sa usapang pang-kapayapaan, nagbalangkas sa adyenda nito at nagtakda ng kondukta ng usapan. Positibo ang pag-atras ng rehimeng Aquino sa nauna

nitong paggigiit ng kagyat na tigil-putukan bilang kundisyon sa muling pagbubukas ng usapan. Ang gayong kundisyon ay labag sa kasunduan sa The Hague.

Dapat ngayong pursigidong mailatag ang daan sa pagdaraos na ng negosasyon para sa Comprehensive Agreement on Social and Economic Reforms (CASER) na siyang ikalawang sustantibong adyenda ng usapan. Pagkatapos ng CASER, ang susunod na paksa ay ang pagbubuo ng komprehensibong kasunduan hinggil sa mga reporma sa pulitika at konstitusyon. At saka lamang pwedeng talakayin ang tungkol sa tigil-putukan at disposisyon ng mga armadong pwersa ng magkabilang panig.

Maaari pang pabilisin ang pag-usad ng usapan kung makikiisa ang rehimeng Aquino sa Maikasing Kasunduan Upang Wakasan ang Gera Sibil at Kamtin ang Makatarungang Kapayapaan na ipinanukala ng NDFP National Council noong 2005 (*tingnan ang talaan ng 10-puntong panukalang kasunduan*).

Ang mga nabanggit ay ilan lamang sa mga usaping maaaring talakayin ng mga panel ng GRP at NDFP sa kanilang mga panimulang usapan. Layunin nitong mailatag ang pinakamainam na kundisyon para magtuluy-tuloy at maging makabuluhan ang prosesong pang-kapayapaan bilang daan sa paglutas ng mga ugat ng gera sibil sa bansa. AB

Sabwatang Akbayan at rehimeng US-Aquino

Litaw na litaw ang pakikipagsabwatan ng reportang Akbayan sa rehimeng US-Aquino. Kapalit ng ilang bilyong pisong pondong ipinalalim sa kontrol nito, tahasang nagpapakasangkapan ang Akbayan sa aktibong pagkalap ng suporta sa loob at labas ng Kongreso para sa programang Conditional Cash Transfer (CCT) ng rehimeng Aquino.

Noon lamang Setyembre, pinuna ng Akbayan ang P21.9 bilyong pondo para sa programang CCT. Sa kanyang talumpati sa Kongreso, sinabi ni Akbayan Rep. Walden Bello na hindi malulutas ng CCT ang kahirapan at pakana lamang ito ng World Bank (WB) at Asian Development Bank (ADB) para lalong ibaon sa utang ang bansa.

Pero noong Oktubre 12, biglang tinalikuran ng Akbayan ang kritisismo nito sa CCT at humanay na sa mga nagtataguyod nito sa Kongreso. Ito mismo ang naghain ng resolusyon na nagpapahayag ng pagsuporta sa CCT na isa umanong epektibong instrumento para abutin at matulungan ang pinakamahihi-rap na mamamayan basta't “wasto itong ipatutupad.” Hiniling lamang nito ang pagbubuo ng isang espesyal na komiteng anito'y susubaybay at magtutulak ng mga hakbanging magsasaayos ng implementasyon ng programa.



Tatlong araw matapos ito, naglaan ang House Committee on Appropriations ng Mababang Kapulungan ng P4.05 bilyon para sa Akbayan mula sa P110.6 bilyong pondo ng Department of Public Works and Highways. Ilang oras bago aprubahan ang alokasyong ito, umikot sa Kongreso si Arlene “Kaka” Bag-ao, isa sa mga kinatawan ng Akbayan upang mangalap ng mga pirma ng mga kongresista pabor sa CCT.

Ikinakatwiran ni Bag-ao na ang pondong inilaan sa Akbayan ay pansuporta sa mga *agrarian reform communities* (ARC). Ito ay mapupunta umano sa mga serbisyo, imprastraktura, pautang at puhunan para sa mga magsasakang benepisyaryo ng Comprehensive Agrarian Reform Program Extension with Reforms (CARPER)—ang ipinamamaral nilang pagpapaunlad sa CARP na katu-naya'y walang pinag-iba sa naunang bersyon ng maka-panginoong maylupang batas.

Binatikos ng Anakbayan, isang progresibong organisasyon ng kabataan, ang pagbaligtad ng Akbayan kapalit ng P4 bilyong *pork barrel*. Anito, ang pagsuporta ng Akbayan sa CCT ay kapalit din ng paghirang ng mga kinatawan nito sa ilang pusisyon sa

gubyerno. Kabilang dito ang pagtatalaga kay Loretta Ann Rosales bilang tagapangulo ng Commission on Human Rights at kay Joel Rocamora bilang pinuno ng National Anti-Poverty Commission.

Binatikos ng mga progresibong organisasyon ang oportunismo ng Akbayan. Ang ipinangangalandakang mga ARC na umano'y paglalaanan ng ₱4 bilyong ibinigay sa Akbayan ay iilan lamang, napakaliit ang saklaw at sa katunaya'y pampakitang-tao lamang. Pinalalabas lamang ng anti-magsasakang gubyerno na ang mga ARC ay halimbawa ng pagtatagumpay ng dating CARP o ng bagong CARPER.

Sa katunayan, anang Kilusang Magbubukid ng Pilipinas (KMP), ginagamit lamang ng malalaking dayuhang kumpanyang agribisnes, kumprador at asendero ang mga ARC para sa *contract growing*, pangunahin na para sa produksyon ng mga pananim na pang-eksport, *bio-fuel* o kaya agro-industriyal; at para sa mga iskemang tulad ng *stock distribution option*, *joint venture*, *corporate farming* at kaayusang *leasehold*.

Halimbawa nito ang pagsasamantala ng dalawang sanga ng pamilyang Cojuangco sa ilang ARC sa pamamagitan ng pagpapairal ng naturang mga iskema sa Hacienda Luisita ng mga Aquino-Cojuangco sa Tarlac, at sa isang dosenang asyenda at iba pang mga lupaing kontrolado ng pamilya ni Eduardo "Danding" Cojuangco sa Isabela, Negros at iba't ibang bahagi ng Mindanao.

Dagdag ni Willy Marbella, *deputy secretary general* ng KMP, ang ₱4 bilyon *pork barrel* ng Akbayan ay kabayaran sa pagsuporta nito sa kampanyang pangpanguluhan ni Aquino at sa pagsisilbi nito sa Kongreso bilang "ikaapat na bahagi ng Communications Group ng Malacañang."

AB

Bahagi ng programang COIN

Ang Akbayan ay patuloy na nagsisilbing kasangkapan din ng Armed Forces of the Philippines (AFP) sa programang *counterinsurgency* ng gubyerno. Ayon sa disenyo ng Oplan Bantay Laya, binabansagan munang mga myembro ng mga prenteng organisasyon ng Partido Komunista ng Pilipinas at Bagong Hukbong Bayan ang mga target na aktibista at lider-masa bilang katwiran sa pamamulang, pagdakip, pananakot at iba pang anyo ng panggigipit.

Kabilang ang Akbayan sa mga gayong tagapagbansag sa mga progresibong organisasyon at mga lider at kasapi nito at nagsisilbing masugid na katuwang ng AFP sa pangangampanya laban sa mga progresibong organisasyon. Matatandaang si Loretta Ann Rosales ang isa sa mga pangunahing nagpapatatag sa rebolusyonaryong kilusan na nagsasagawa raw ng ekstorsyon sa mga lugar na saklaw ng Akbayan.

Ang CCT ay nasa balangkas ng programang *counterinsurgency* (COIN) ng US. Nagpapautang ang World Bank ng pondo para sa CCT at ginagamit iyon bilang katuwang ng Oplan Bantay Laya. Katuwang sa pagpapatupad nito ang AFP sa pamamagitan ng Kalayaan Barangay Program (KBP) na ipinatutupad na nito simula 2005. Inianunsyo naman ni Aquino na sa susunod na taon ay mayroon nang bagong programang COIN na ilulunsad, kung saan magiging bahagi ang mas pinalawig pang bersyon ng CCT.

Sa pagbibigay-matwid sa pagsuporta nito sa CCT, tahasang inilantad ng Akbayan ang repormismo nito at ang pagbuntot nito sa reaksyunaryong naghaharing estado. Inilarawan nitong isang "koalisyonang panreporma" ang maka-imperyalista at maka-asenderong rehimeng Aquino upang paasahin ang mamamayan sa mga pangako ng rehimen at ilayo sila sa landas ng rebolusyonaryong pakikibaka.

Akbayan at rehimeng US-Arroyo

Maging sa panahon ng rehimeng Arroyo, isa rin ang Akbayan sa nabiyayaan nang husto sa pamamagitan ng malalaking tinanggap na *pork barrel*, habang ang mga kinatawan ng mga progresibong partido ay puspasang ginipit. Tinumbasan ni Gloria Arroyo ng masaganang *pork barrel* ang paninira ng Akbayan sa katunggali niyang si Fernando Poe Jr. noong eleksiyong 2004.

Binigyan ng rehimeng Arroyo ng ₱25 milyong *pork barrel* sa anyo ng Priority Development Assistance Fund (PDAF) at karagdagan ₱10 milyon mula sa alokasyon para sa DPWH si Risa Hontiveros-Baraquel, dating kinatawan ng Akbayan. Tumanggap muli ng ₱10 milyon *pork barrel* noong 2005 si Baraquel. Umabot sa ₱200 milyon ang kabuuang tinanggap ng Akbayan mula 2004 hanggang 2005 mula kay Arroyo.

Noong nakaraang eleksyon naman, nakinabang din ang Akbayan sa kampanya nito para kay Aquino at tumabo ng malaking halaga. Isa sila sa mga nangungunang grupong *partylist* na lumagpas sa itinakdang gastos para sa kampanyang eleksyon. Umabot sa ₱52 milyon ang kanilang gastos sa mga patalastas sa radyo, telebisyon at dyaryo.

AB



Limos, hindi lunas sa kahirapan

Ayon sa pag-aaral ng Ibon Foundation, umaabot sa \$59.1 milyong pondo ang nakuha ng Kapit-bisig laban sa Kahirapan-Comprehensive and Integrated Delivery of Social Services (Kalahi-CIDSS) at ₱3.4 bilyon naman sa Kalayaan Barangay Program (KBP). Ipinagmamayabang ng guberno na nakatulong ang Kalahi-CIDSS sa mahigit 1.1 milyon benepisyaryo habang ang KBP naman ay tumarget sa proyekto sa Mindanao partikular sa Compostela Valley at Davao Del Norte para umano sa “kapayapaan at kaunlaran.”

Iginiit ng Ibon Foundation na napakaliit lamang na saklaw ang inabot ng mga nasabing proyekto. Hindi rin makatotohanan ang sinabi ng WB na mabisa ang CCT sa pagbibigay-trabaho sa kabataang mahihirap. Sa katunayan, makapagbibigay-suporta lamang ito sa mga mag-aaral hanggang Grade 6. Anito, kung sa 4.6 milyong walang trabaho na kabataan ay 44% ang nakaabot sa hayskul at 43% ang umabot sa kolehiyo, lalong mahihirapang magkapagtrabaho ang mga hanggang Grade 6 lamang ang inabot.

Dagdag pa, malaking bahagi ng pondo ng CCT ay hindi napupunta sa mga tunay na mahihirap kundi sa mga maykaya, habang ang signipikanteng bahagi ng mga tunay na pinakamahihirap ay di naman naaabot ng programa. Kabilang sa mga ito ang mga walang permanenteng tirahan—dahil wala silang istableng trabaho o hanapbuhay o kaya’y mga iskwater lamang sila na pinalalayas, mga matatandang mahihirap na walang anak, at iba pa. Malaki rin ang nailalaan sa sweldo at panggastos ng mga *enumerator* (mga nangangalap ng impormasyon) at burukrasya sa pagpapatupad nito, at malaking bahagi nito ay nauubos lamang sa korapsyon.

Hindi nilulutas ng CCT ang tunay na dahilan ng karalitaan. Isa lamang itong programang palimos at di nakapagpapaunlad sa mga sinasabing target na tulongang pinakamahihirap. Bagkus ay pinananatili silang tuluy-tuloy na mahirap, busabos at api.

Samantala, nagpapalaki rin ng panlabas na utang ng bansa ang CCT. Umaabot na sa ₱35 bilyon ang utang ng CCT mula sa mga dayuhan at maari pa itong lumobo hanggang 2016. **AB**

41st IB, hinambalos ng BHB sa Abra



Muling hinambalos ng Bagong Hukbong Bayan (BHB) sa Ilocos-Cordillera Region (ICR) ang mga pasistang kaaway. Pitong sundalo ng Alpha Coy ng 41st IB ng Philippine Army ang napatay at lima pa ang nasugatan sa dalawang magkasunod na pananambang ng mga Pulang mandirigma ng Agustin Bernalen Command ng Bagong Hukbong Bayan (ABC-BHB) noong umaga ng Oktubre 30 sa Abra. Walang kaswalti sa panig ng BHB.

Nasamsam sa mga reaksyunaryong tropa ang isang M60 *machine gun* at dalawang M16, mga bala at ilang dokumentong militar.

Naganap ang unang ambus sa Barangay Lenneng, Baay-Licuan alas-5:20 ng umaga. Apat na sundalo ang agarang napatay sa ambus na ito. Pagkalipas ng 30 minuto ay tatlo pang sundalo ang napatay nang muling bigwasan ng mga Pulang mandirigma ang pwersang reimporsment sa Barangay Barbarit sa kapalit na bayan ng Lagangilang. Ang lugar ng mga labanan ay ilang minuto lamang ang layo sa hedkwarters ng 503rd Brigade sa Barbarit, sa dalawang *patrol base* at sa *advance command post* ng 41st IB.

Ayon kay Ka Diego Wadagan, tagapagsalita ng ABC-BHB, inilunsad ang ambus bilang pagparusa sa matitinding paglabag ng yunit-militar sa karapatang-tao ng mga Tingguian. Parusa rin ito sa pagsisilbing protektor at “*security escorts*” ng 41st IB sa malalaking kumpanya sa pagmimina. Kasalukuyang nagmimina sa lugar ang Cordillera Exploration Co. Inc., lokal na subsidyaryo ng Anglo-American PLC, ang pinakamalaki at isa sa pinakamapaminsalang kumpanya sa pagmimina sa buong mundo.



Ang mga sundalo sa ilalim ng 503rd Brigade ng Northern Luzon Command ay walang habas sa pambobomba at pang-iistraping sa mga komunidad, pagsasagawa ng iligal na pang-aaresto at detensyon, pagtortur at pagpatay sa mga mamamayan ng Abra, laluna sa mga Tingguian. Ginagawa ring mga baraks ng militar ang mga *day care center*, *barangay hall* at maging ang mga bahay ng mamamayan. Karaniwan ang pagbabansag sa mga mamamayan na mga tagasuporta ng rebolusyonaryong kilusan at nilimitahan ang pagkilos ng mga taumbaryo. Bunsod ng matinding militarisasyong ito, naparalisa ang produksyon at ang maliitang pagmimina.

Nakapakat ang mga elemento ng 41st IB sa mga lugar kung saan mayroon nang aprubadong permiso at nakasalang na mga aplikasyon sa pagmimina. Kabilang dito ang mga bayan ng Tineg, Lacub, Baay-Licuan, Sallapadan, Dagoman, Malibcong, Tubo at Bucloc. Sa kasalukuyan, 36 ang aplikasyon sa pagmiminang nakasalang sa Mines and Geosciences Board-Department of Environment and Natural Resources (MGB-DENR). Nabigyan na ng mga permiso ang Rio Dorado, Olympus-Pacific, Sulfotara, Magdaleno/Miguel M. Peña, Abra Mining Industrial Company at ang Cordillera Exploration Company Inc.

"Ang pinakahuling taktikal na opensiba ng BHB sa Abra ay nagpapakita sa mataas na kapasyahan at kakayahang makipaglaban ng mga Pulang mandirigma. Ipinamalas nito ang kapasyahang makipaglaban ng rebolusyonaryong kilusan kasabay ng mamamayan sa mga mandarambong at mangangamkam ng lupa, na malawakang sumisira sa kapaligiran at yumuyurak sa karapatang-tao," dagdag ni Ka Diego Wadagan. AB

Mga paglabag sa karapatang-tao sa Rizal

ANIM na sibilyan ang naging biktima ng ekstrahudisyal na pamamaslang sa prubinsya ng Rizal mula nang maging presidente si Benigno Aquino III. Wala pa kahit isang naparurusahan sa mga sundalo ng 16th IB at mga elemento ng SAF Maneuver Battalion-PNP na siyang may kagagawan ng mga krimeng ito. Ang 16th IB, sa partikular, ay kilala bilang berdugong batalyon dahil sinanay ito ni Gen. Jovito Palparan nang maging hepe siya ng 2nd Infantry Division noong 2003.

Pinakahuling mga biktima ng ekstrahudisyal na pamamaslang sa Rizal sina Junior Asyong, isang *chainsaw operator* at ang kanyang katulong na nagngangalang Co-coy, kapwa taga-Sityo Lucutan, San Isidro, Rodriguez. Napatay sila noong Setyembre nang basta na lamang paulanan ng bala ng mga pinagsamang pwersa ng 16th IB at SAF Maneuver Battalion ng PNP ang mga kubong pahingahan ng mga magkakahoy sa Puray, Rodriguez. Agad na namatay sina Asyong samantalang nakatakbo ang apat pa nilang kasamahan. Para pagtakpan ang kanilang krimen, sinabi na lamang ng mga sa-

larin na ang mga napatay ay mga kasapi ng Bagong Hukbong Bayan (BHB).

Bago ito, pinaslang din sa Baryo Macabud, Rodriguez ang sibilyang si Rene "Buhawi" Resureccion. Binaril siya sa ulo malapit sa detachment ng 16th IB.

Nailathala na dati sa AB ang pagkakapaslang sa tatlong Dumagat na mga myembro ng Katribu Party. Pinagbabaril ng mga nakamotorsiklong elemento ng *death squad* sina Galman Navarete, Demilita Largo at Benita San Jose sa San Isidro, Rodriguez noong Hulyo 19.

Samantala, noong Oktubre 13 ay iligal na inaresto ang dalawang Dumagat na dating mga myembro ng BHB. Dinampot ng 16th IB sina Alberto San Jose, 24 anyos, at Crisanto de la Calzada, 23 anyos, kapwa pansamantalang naninirahan sa Puray, Rodriguez. Hanggang ngayong hindi pa rin sila ipinakikita sa kanilang mga pamilya at kaibigan. Sapilitan silang hinahawakan ng mga sundalo kahit walang nakasampang kaso laban sa kanila, at ginagawang giya sa mga operasyong militar. AB

Pagrerekluta ng mga menor-de-edad sa CAFGU, laganap sa Batangas

NASA isang ospital ngayon sa Metro Manila ang isang menor-de-edad na nagkaroon ng sakit sa pag-iisip matapos pagmalupitan ng militar dahil sa pagtanggap ng kanyang mga magulang na reklutahin siya ng mga sundalo sa CAFGU.

Si "Joel" (di tunay na pangalan), 17-taong gulang at dating residente ng Sityo Calabasahan, Barangay Quipot, San Juan, Ba-

tangas ay sapilitang nirerekluta sa CAFGU ng mga kagawad ng 740th Combat Group ng Philippine Air Force na pinamumunuan ni Lt. Col. Arnel Villareal, katuwang ang 59th Infantry Battalion ng Philippine Army.

Ika-28 ng Agosto nang maganap ang pambubugbog kay "Joel" sa isang pasyal ng mga sundalo na ginanap sa Laiya Beach Resort, sa San Juan. Imbitado noon ang

ilang kabataan mula sa baryo sa pasyalang ito.

Pinagbintangang nambastos ng babae si "Joel" nang siya ay magkamaling pumasok sa palikuran ng mga babae. Nang makita siya ng tatlong sundalo na noo'y lasing, kaagad siyang kinaladkad sa isang hiwalay na banyo at pinagbubugbog. Kinilala ang mga bumugbog sa kanya na sina Sergeant Areta, Casapao at Casanova ng 740th CG PAF na kasalukuyang nagkakampo sa tabi ng eskwelahan elementarya sa Sityo Calabasahan.

Pag-uwi sa bahay ay dumadaing na si "Joel" na masakit ang kanyang tiyan at dibdib at nabibingi ang kanyang kanang tenga. Ilang araw makalipas nito ay nilagnat siya. Dalawang araw makalipas ang insidente, nalaman ng kanyang mga magulang mula sa ilang nakasaksi sa pangyayari ang brutal na sinapit ng kanilang anak. Takot na takot si "Joel" nang kumprontahin nila siya tungkol dito dahil pinagbantaan siyang papatayin ng mga

sundalo kapag nalaman ng kanyang mga magulang ang pangyayari.

Ilang araw mula nang maganap ang insidente, kinakitaan na si "Joel" ng pagkatulala. Bigla rin siyang sumisigaw at umiiyak. Kalauanan ay bumigay ang dati niyang malusog na pag-iisip.

Bago ito ay palagi na ring minamaltrato at binubulyawan ng militar si "Joel" dahil sa pagtanggap ng kanyang mga magulang na pasanibin siya sa CAFGU.

Samantala, matapos mailathala sa pahayagan ang kaso ni "Joel" ay lalong hinaras ng mga sundalo ang kanilang pamilya. Pinalibutan ang bahay nila ng mga sundalo noong Setyembre 13. Dahil dito ay napilitan na silang lumipat ng tirahan.

ANG sapilitang pagrerekut ng mga menor-de-edad sa CAFGU ay lagang ngayon sa Batangas. Sa pagtatapos ng rehimeng Arroyo at pagsisimula ng administrasyong Aquino, dumagsa ang pitong batalyon ng magkasanib na mga pwersa ng

Philippine Air Force at Philippine Army sa lalawigan at nagtayo ng mga kampo militar sa loob ng mga sibilyang komunidad. Ginamit na kampo ang mga pampublikong pasilidad tulad ng *barangay hall*, *daycare center*, kapilya at maging eskwelahan katulad ng ginawa sa baryo nina "Joel."

Habang nasa komunidad ay sadyang ineengganyo ng mga sundalo ang mga kabataan na maging malapit sa kanila sa pamamagitan ng pag-imbata sa kanila na mag-*videoke*, makipaglasingan o mamasyal. Kapag napapalapit na sa kanila ang kabataan ay inuutus-utusan na silang magluto, mag-igib ng tubig, magmasahe sa mga sundalo at iba pa. Rerekutin silang sumapi sa CAFGU at kalauna'y magsundalo, kapalit ang kung anu-anong pangako tulad ng pagtatapos sa pag-aaral at mas malaking kita. Nilalait ang mga tumatanggi at binabansagang tagasuporta ng Bagong Hukbong Bayan ang kanilang mga pamilya. **AB**

Pagtutol sa pagmimina, lumalawak


Lumalawak ang pagtutol ng iba't ibang sektor sa pagbubukas ng rehimeng Aquino ng papalawak na bahagi ng bansa sa pagmimina ng malalaking dayuhang kumpanya. Ito ay matapos ipahayag ng Chamber of Mines of the Philippines (CMP) na 19 na malalaking kumpanya sa pagmimina ang nakatakdang pumasok sa bansa sa susunod na taon.

Nagpahayag ng pagtutol nitong Oktubre 31 ang mga obispo ng Simbahang Katoliko sa Eastern Visayas (EV) sa mapaminsalang mga operasyon sa pagmimina. Sa isang liham pastoral, nag-apela ang mga lider ng simbahan na tigilan na ang pagmimina at ibalik ang dati'y magandang lupa ng rehiyon. Nilagdaan iyon nina Archbishop Jose Palma ng Palo (Leyte), Bishop

Emmanuel Trance ng Catarman (Northern Samar), Bishop Crispin Varquez ng Borongan (Eastern Samar), Bishop Precioso Cantillas ng Maasin (Southern Leyte), Bishop Isabelo Abarquez ng Calbayog (Samar) at Bishop Felomino Bactol ng Naval (Biliran).

Nagkaroon din ng martsa-rali ang iba't ibang grupong Lumad sa Mindanao na kabilang sa grupong *partylist* na Katribu sa harap ng mga upisina ng Mines and Geosciences Bureau Office, CHR, at NCIP sa Davao City noong Oktubre 29. Tinutulan din nila ang pagpasok ng mga imperyalistang pagmimina sa Davao City at sa mga prubinsya ng Davao.

Sa Ilocos-Cordillera, nagpahayag ng maring pagtutol si Rep. Teodoro Baguilat sa pagmimina nitong Oktubre 27 sa pulong ng Advisory Committee of the Regional Development Council (RDC Ad Com). Taliwasumano ang pagbukas sa rehiyon sa malalaking



korporasyon sa pagmimina dahil ang prayoridad ng RDC ay gawing “watershed cradle” ang Northern Luzon. Itinatakd nito ang pangangailangang pangalagaan ang kapaligiran upang tiyaking hindi matutuyuan ng tubig ang mga ilog at lawa na ginagamit sa paglikha ng kuryente at pagsuplay ng irigasyon para sa kapatagan.

Nagpahayag ng gayon ding paninindigan sina Rep. Maximo Dalog ng Mt. Province at Rep. Bernardo Vergara ng Baguio City. Ayon kay Baguilat, dumadayo ang malalaking dayuhang kumpanya ng mina sa mga bansa tulad ng Pilipinas dahil maraming restriksyon tungkol sa pangangalaga sa kapaligiran sa kanilang mga bansa.

Sa rehiyon ng Western Mindanao, mahigpit na binabantayan ng tribong Subanen sa Midsalip, Zamboanga del Sur ang posibleng pagpasok ng mga kagamitan sa pagmimina ng Geotechniques and Minerals Inc. (GAMI) para sa kanilang mga operasyong eksplorasyon sa Pinukis Mountain Range. Matagumpay nilang napaatras ang kagamitan para sa *drilling* ng GAMI nang magtayo sila ng barikada sa Barangay Sigapod noong Oktubre 5 at Barangay Guinabot noong Oktubre 9.

Ang eksplorasyon ng GAMI ay pinahintulutan ng

Mines and Geosciences Bureau sa pamamagitan ng Mineral Production Sharing Agreement (MPSA). Sa ngayon, 14 na kumpanya ang may nakasalang na mga aplikasyon para magmina sa 31 sa 33 barangay ng Midsalip. Saklaw ng mga aplikasyon ang 19,000 ektarya ng kabuuang 28,000 ektarya ng bayang ito. Pangunahing miminahin sa lugar ang bakal, ginto at pilak. Mahigpit ang pagtutol ng mga Subanen sa pagmimina dahil wawasakin nito ang *watershed* ng bayang nagsuplay ng irigasyon sa 1,200 ektaryang palayan at pinagmumulan ng umaabot sa P87 milyong taunang kita ng mga magsasaka sa lugar. Sisirain din nito ang proyektong reporestasyon sa limang baryo ng Midsalip na sinimulan noon pang dekada 1990.

Samantala, sinabi ng National Democratic Front-EV na ang usapin ng mapaminsalang dayuhang pagmimina ay nagpapatingkad sa matinding pangangailangan ng mga repormang sosyo-ekonomiko para malutas ang mga problema ng karalitaan, dayuhang pagsasamantala at pagkawasak ng kapaligiran. Ang kasalukuyang pagkakaisa ng simbahan at mamamayan sa Eastern Visayas laban sa pagmimina ay maaaring tumungo sa paggigiit ng mga repormang sosyo-ekonomiko at pagtutulak sa usapang pangkapayapaan bilang isa sa mga esensyal na pamamaraan para makamit ito. AB

Lumalaganap na pagpapatanim ng kasaba ng Cojuangco-SMC

Lumalaganap ang pagpapatanim ng *hybrid* na kasaba (kamoteng kahoy) bilang kapalit ng *hybrid* na mais sa iba't ibang bahagi ng Isabela tulad ng San Mariano, Ilagan, Cauayan, Echague at San Guillermo. Tulak ito ng mga imperyalistang korporasyong agro-kemikal, multinasyunal na korporasyon gaya ng San Miguel Corporation (SMC) at ahente nilang mga lokal na komersyante-usurero.

Ginagawa nila ang pagbabagong ito sa pananim ng mga magsasaka hindi para matulungan ang mga magbubukid. Nagsisilbi pa rin ito sa kanilang mga interes na may pagbabago lamang ng diin ayon sa pagbabago ng ihip sa pamilihan. Kakambal nito ang pamimilit sa mga magsasaka, lalo na sa mga nakautang sa kanila.

Pagkalugi sa Cargill

Matagal nang bagsak presyo ang mga mais ng Monsanto Cargill sa buong bansa. Ang mga binhi ng

Cargill ang karaniwan nang itinatanim ng mga magsasaka mula pa nang lumaganap ang mga *high-yielding variety* (HYV). Ang produktong mais ay binibili ng mga korporasyon pangunahin para gawing pagkain ng hayop at sangkap sa pagpoproseso ng mga produktong makakain.

Ngunit sa buong mundo, sumosobra na ang nalilikhang HYV na mais dahil sa pilit na pagtutulak ng mga imperyalista. Ang mas masaklap pa rito, itinatambak nila ang mga ito sa mga atrasadong bansa



gaya ng Pilipinas, kung saan nakararanas ng mababang ani at malalang pagkalugi ang mga magsasaka.

Di hamak na mas mababa ang presyo ng mga inangkat na mais ng Cargill, dahil galing ang mga ito sa mga bansang abante ang teknolohiya sa agrikultura at suportado pa ito ng estado. Kaya mas gusto ng mga korporasyong gaya ng SMC na mag-angkat na lamang. Bunga nito, lalong nalugi ang produksyon ng Cargill sa Pilipinas. Lalo namang nalugi ang mga magsasakang nagtatanim nito.

Inamin mismo ng gubyernong panlalawigan ng Isabela at maging ng Department of Agriculture (DA) at Department of Agrarian Reform ang pagkaluging ito. Nagpanggap naman ang rehimeng Arroyo noon na may hakbangin ang gubyrerno para ibsan ang paghihirap ng masang magsasaka—palaging pumapasyal sa Isabela ang dating kalihim ng DA na si Arthur Yap. Binili ng panlalawigang gubyrerno ng Isabela ang ibang mga produktong Cargill kaya't naobligang maghanap ng iba pang mga tagapamilya ng mga produktong ito sa Vietnam at iba pang bansa.

Mayayaman ang nakinabang

Pero tanging mga komersyante-usurero ang nakakuha ng benepisyo. Bago makakuha ng "tulong," hinahanapan ng papeles ang lupa. Ang mga negosyante lamang ng Cargill at mga nagpapautang ang nakalusot sa krisis, dahil sila ang kalakhan na nakatupad sa rekisitonang ito. Sila na ang pangunahing nagbenta sa gubyrerno habang ang karamihan ng magsasaka ay walang mapagpilian kundi ang P3 bawat kilong presyo sa mga bodegang nauutangan nila.

Nanatili rin ang pandaraya ng mga komersyante-usurero sa pagtimbang, pagpepresyo, pagkaklasipika at iba pa. Pinahigpit nila ang sistema ng nagpapautang sa pamamagitan ng pag-ilit sa lupa ng mga di makabayad.

Pilit na pagpapatanim ng kasaba


Mula 2007, inumpisahan naman ng SMC at mga kasabwat nito ang pagpapatanim ng kasaba. Ang mga ito ay ipoproseso upang mapulbos at maging arina, na sangkap ng maraming produkto ng SMC. Mataagal na ring nagkakainteres ang mga lokal na naghaharing uri sa *biofuel gas*, at isa ang kasaba sa maaaring pagmulan nito basta't malawakan ang pagtatanim.

Ang mantikang pinanggisa ng mga usurero sa mga magsasaka noong nagtatanim sila ng mais ay siya rin ngayong pinaglulutuan sa kanila sa pagbaling ng pananim sa kasaba. "Sige, para makabayad kayo ng utang, kasaba na lamang ang itanim ninyo. Mas mura pa ang puhunan," ayon sa mga komersyante na pinangungunahan ni Sangguniang Bayan Kagawad Deri Pascual ng San Mariano, Isabela. Si Pascual ang presidente ng asosasyon ng mga komersyante-usurero sa nasabing bayan. Hawak din niya ang Committee on Agriculture doon, isang pusisyong ginamit niya para maipatupad ang atas ng SMC na magpatanim ng kasaba.

Hinihigpitan ng mga usurero gaya niya ang nagpapautang para sa pagtatanim ng Cargill, pati na ang abono at pestisidyo para rito. Kapit sa patalim ang maraming magsasaka dahil wala na silang mautang na binhi ng mais. Bukod dito, mas mabuti na ang umayon kaysa mailitan ng lupa, rason ng iba.

Mapagsamantalang sistema

Nangungutang ang mga magsasaka ng 100-150 bigkis ng sanga ng kasaba bilang pambinhi, na nagkakahalaga ng P20. Pero kahit binili na nila, kung makaani matakpos ang 10 buwan ay ibabalik nila ang kalahati bilang interes sa swapang na usurero. Imbes na sa magsasaka na ito, ang P10 kada bigkis



ay ibabalik pa niya. At ang mga sunod na binhi ay pilit na ipinabebenta sa pinagmulang bodega, sa halagang P5. Ito rin ang bibilhin sa kanila ng mga magsasaka, sa halagang P20 na.

Ang mga maaaning kasaba ay kailangang hiwa-hiwain ng mga nagtanim. Dahil matigas at makati ang mga kasaba, kailangang ipathresher ito na pagkakagastusan uli ng magsasaka. Ibibilad nila, isasako, at dadalhin sa bodega. At gaya ng dating mapagsamantalang kaayusan, ang magsasaka ang bahala sa pamasahe ng mga produkto. Bibilhin ito ng mga komersyante sa halagang P6 hanggang P8 kada kilo; at gaya ng mais, depende iyan kung *dry*, *good*, o *reject*.

Lalo lamang nalulugi ang mga magsasaka. Ang mais na kapareho lamang ang presyo ay naitatanim nang dalawang beses kada taon, kumpara sa kasaba na minsan lamang. Di hamak na mas malaki pa sana ang kita ng magsasaka kung palay ang tanim, o gulay.

Pang-aagaw pa rin sa lupa

Mangangahulugan pa rin ng pagkaagaw ng mga lupain ng mga magsasaka ang pagpapalit nila ng tanim, sa dikta ng multinasyunal na korporasyon at sa ilalim ng kontrol ng mga komersyante-usurero. Ang pagkalugi ng mga magsasaka sa pagtatanim ng kasaba ay maglu-

lubog sa kanila sa utang, hanggang mabitiwan ang lupang pinaghirapan. May titulo man o wala, ang lupa ay magsisilbi sa kapakinabangan ng mayayaman, hindi sa mga nagbubungkal.

Kung susuriin, ang kasalukuyang pagpapatanim ng kasaba ng SMC ay tulad ng naunang Cassava Plantation Project na naiba na lamang ang saklaw at pakana. Ang Cassava Plantation Project ay inilunsad ng SMC noong 2002. Plano nito noong patamnan ang mahigit 150,000 ektarya ng lupain sa iba't ibang bahagi ng Cagayan Valley.

Pangunahing paraan na ginamit noon ang *corporate-farming* o *cooperative farming*, kung saan magkasosyo raw ang SMC at mga magsasaka. Magpapautang

ang SMC, magbabayad ang mga magsasaka; ang lupa ay kukunin, pagkakaganansyahan at kokontrolin ng SMC.

Masaklaw at matinding nilabanan ito ng mamamayan ng Isabela, at napilitan si Cojuangco na iatras ito noong 2005. Ang kasalukuyang pagpapatanim muli ng kasaba ay maliwanag na pagtatangkang ipatupad muli ang mapagsamantalang proyekto, ngayon sa lalong pang malawak na saklaw.

Tusong inilulusot ang proyektong ito sa papalawak na pagpapatanim, pakikipagsabwatan sa mga komersyante-usurero at panlilinlang na "magpapaunlad" ito ng kabuhayan. Nagkakaisang lalabanan itong muli ng mamamayan. AB

ILPS, sumusuporta sa pambansang welga ng mga anakpawis at mamamayan ng France

Nagpahayag ng pakikiisa at suporta ang International League of Peoples' Struggle (ILPS) sa milyun-milyong manggagawa, kabataan at iba pang mamamayan ng France na naglunsad ng pangkalahatang welga mula Setyembre 7 hanggang Oktubre 19 laban sa mapagsamantala at mapanupil na estado ng France at mga naghaharing uri nito.

Kinundena ng ILPS ang tinaguriang reporma sa pensyon na nagpapataas sa edad ng minimum na pagreretiro mula 60 hanggang 62. Kabilang ito sa mga hakbang sa pagtitipid para ipasa ang bigat ng krisis sa anakpawis at mamamayan. Binatikos din ng ILPS ang panggigipit ng gubyernong Sarkozy sa mga welga at protestang masa laban sa tumataas na tantos ng kawalan ng trabaho at paglala ng kundisyon sa pagtatrabaho at pamumuhay.

Pinuri ng ILPS ang koordinadong pagkilos ng mga manggagawa at mamamayan na naglalantad sa ugat ng lumalalang krisis ng pandaigdigang kapitalistang sistema. Sinaluduhan din nito ang mga manggagawa ng France sa kanilang paggamit ng maniningning na mga taktika tulad ng blokeyo para maging epektibo ang pangkalahatang welga laban sa mga tusong pagsisikap ng gubyernong Sarkozy na pi-

gilan ito. Ikinagalak ng ILPS ang paglahok ng mga manggagawa sa transportasyon at lahat ng mga unyon ng manggagawa sa buong France para maging mabisa ang pambansang welga.

Nanawagan ang ILPS sa mga myembro at mga alyadong organisasyon nito sa France na pursigido at militanteng lumahok sa naturang pambansang welga at tumulong sa pagpapalakas ng pakikibaka sa pamamagitan ng pakikipagtulungan sa lahat ng organisasyong nagwewelga.

Halos naparalisa ang buong bansa nang magkasabay na magwelga ang mga manggagawa sa sasakyan ng bus, tren, eroplano at mga planta at pabrika. Sinabayan ito ng mga welga ng mga hayskul na estudyante sa 300 eskwelahan at ilang pribado at pampublikong upisina. Ang pinakamatingkad na pagkilos ay ang welga ng mga manggagawa sa 12 pabrika sa pag-



rerepina ng langis at dalawang malalaking imbakan ng gasolina sa France. Sinabayan ito ng blokeyo ng mga welgista sa mga daungan.

Bunga nito, hindi nakadaong ang daan-daang barko sa pantalan ng syudad ng Marseille. Nagresulta rin ito ng pagkaubos ng 40% ng suplay ng gasolina sa 4,000 sa 12,000 istasyon ng gasolina sa buong France. Maraming eskwelahan at upisina ang nagsara at nagkahul-buhol ang sistema ng transportasyon. Batay sa tantya ng gobyerno, umaabot sa \$557 milyon bawat araw ang halagang nawawala buong ng welga.

Sa pagsisikap na mahinto ang

Sundan sa "ILPS..." sa pahina 11

ANG BAYAN Nobyembre 7, 2010

2,600 manggagawa ng PAL, sinibak

AABOT sa 2,600 manggagawa ng Philippine Air Lines (PAL) ang masisisante matapos katigan ni Secretary Rosalinda Baldoz ng Department of Labor and Employment (DOLE) nitong Oktubre 30 ang naunang desisyon na nagsasabing ligal ang planong pagsibak sa mga empleyado. Karamihan sa maapektuhan ay mga manggagawang nasa mga operasyong *in-flight catering*, *airport services* at *call center*.

Binatikos ng Philippine Air Lines Employees Association (PALEA) bilang iligal na hakbang at isang anyo ng pangwawasak ng unyon ang desisyon ni Baldoz dahil nagpapatuloy pa rin ang pakikipagnegosasyon nila sa maneydsment ng PAL.

Pagpatay ito sa seguridad sa trabaho sa PAL, ani Gerry Rivera, pangulo ng PALEA. Ang papalit sa

mga sinibak ay mga hindi kasapi ng unyon at kontraktwal na mga manggagawa. Tatanggap sila ng mas mababang sahod at bawas na mga benepisyo. Wala silang seguridad sa trabaho at walang proteksyon mula sa unyon, dagdag pa ni Rivera.

Kinundena rin ng Kilusang Mayo Uno (KMU) ang naging desisyon ng DOLE. Ani Lito Ustarez, Executive Vice President ng KMU, pag-aalipusta at pagpapahirap ang pagsibak sa libu-libong manggagawa ng PAL. Magiging masamang bahid naman sa rehimeng Aquino ang isyu sa PAL kapag hindi ito tinugunan katulad ng nangyari sa *hostage crisis* sa Maynila noong Agosto. Nakipag-usap din ang KMU sa PALEA kaugnay sa mga gagawing serye ng mga kilos-protesta.

Ayon sa DOLE, hindi naman umano tuluyang mawawalan ng

trabaho ang mga tinanggal dahil tatanggapin sila bilang mga kontraktwal na kawani ng mga *service provider* tulad ng SkyKitchen Phil., Inc. (*catering*), SkyLogistics Phil (*airport services*) at ePLDT Ventus (*call center*). Ang mga *service provider* na ito ay may bahaging pag-aari si Lucio Tan—ang may-ari ng PAL at isa sa malalaking kontributor sa pondong pangampanya ni Aquino, ayon sa PALEA.

Samantala, mag-aapela ang mga manggagawa sa Court of Appeals. Naglunsad sila ng mga kilos-protesta una sa punong tanggapan ng DOLE sa Intramuros, Maynila simula nitong Nobyembre 1. Sa Mababang Kapulungan, binigyang prayoridad ang pag-iimbestiga sa malawakang tanggapan sa PAL kasunod ng mga panukala ng mga kinatawan ng partidong Anakpawis at Gabriela Women's Party. **AB**

"ILPS...", mula sa pahina 10

welga, binuwag ng mga *riot police* ang piket ng mga estudyante at nagboblokeyong mga manggagawa sa mga lansangan at nagsagawa ng maramihang pang-aaresto. Sa Lyon, Paris, lumaban ang mga estudyante na nagresulta sa pagkasunog ng isang sasakyan ng pulis.

Sa kabila ng kahirapan at kaguluhan sa transportasyon, mayorya ng mamamayan ang sumusuporta sa pambansang welga. Sa kabilang banda, ayon sa pinakahuling mga sarbey ay diskontento ang mahigit 70% ng mamamayan kay Sarkozy laluna nang gumamit na siya ng dahas laban sa mga welgista.

Bago ito, nakapaglunsad na ng tig-isang araw na welga ang mga unyon ng manggagawa nitong nagdaang mga buwan. Nag-iibayo ang mga welga habang papalapit na ang pagtalakay sa naturang panukala na reporma sa pensyon sa parlamento ng France. **AB**

Alyansa para sa mga magbubukid sa Hacienda Luisita, binuo

ISANG malawak na alyansa ng mga magsasaka at manggagawang bukid sa Hacienda Luisita ang binuo noong Oktubre 30 upang igiit sa gubernong Aquino at Korte Suprema ang agarang pamamahagi ng 6,400 ektaryang lupain ng angkan Cojuangco-Aquino. Inilunsad ang Luisita Peasants and People's Alliance (LUPPA) sa De La Salle-College of St. Benilde sa Maynila.

Layunin ng LUPPA na magbigay ng pinakamalawak na suportang moral, ligal at pulitikal sa mga manggagawang bukid na nakikipaglaban sa isa sa pinakamalalaking angkan ng panginoong maylupa sa bansa, ayon kay Edna Velarde, *national coordinator* ng Unyon ng Manggagawa sa Agrikultura (UMA) at isa sa mga tagapagtatag ng LUPPA.

Lumahok sa paglulunsad ng LUPPA ang iba't ibang grupo ng simbahan, mga artista, mga estudyante't guro at iba't ibang organisasyong sektoral. Kabilang sa mga ito sina Fr. Gregorio Obejas, O.S.M.; Councilor Emmie Ladera ng Tarlac City; Atty. Jobert Pahilga, *executive director* ng Sentro para sa Tunay na Repormang Agraryo (Sentra); Rustum Casia, isang *visual artist*; at ang Catholic Bishops Conference of the Philippines-National Secretariat for Social Ac-

tion (CBCP-NASSA).

Sa kabila ng desisyon ng Department of Agrarian Reform (DAR) na nagbasura sa Stock Distribution Option (SDO) at nag-uutos na agad ipamahagi ang lupa ng asyenda sa mga benepisyaryo nito, patuloy pa ring nagmamatigas ang maneydsment ng Hacienda Luisita Inc. (HLI) laban dito.

Anim na taon matapos mangyari ang masaker sa Hacienda Luisita noong Nobyembre 2004, mailap pa rin ang hustisya para sa mga biktima. Kaugnay nito, mag-iipon ang LUPPA ng dagdag na suporta mula sa mamamayan para tulungan ang mga magbubukid na makamit ang hustisya.

Binatikos din ng aliyansa ang umiigting na milita-

risasyon ngayon sa siyam na barangay na saklaw ng asyenda. Bukod sa mga Citizens Armed Forces Geographical Unit (CAFGU), na iniulat na nagtatatag ng mga detatsment, nakatakdang idaos dito ang US-RP Balikatan Exercises.

Ano ang motibo ng pagdaraos ng RP-US Balikatan Exercises sa asyenda? Ito ang tanong sa maneydsment ng HLI at sa administrasyon ni Benigno Aquino III ni Lito Bais, tagapangulo ng United Luisita Workers' Union (ULWU) at isa rin sa mga tagapagtatag ng LUPPA. Ani Bais, hindi naman kampo militar ang Luisita. May pagtingin siyang ginagamit ang RP-US Balikatan Exercises para maghasik ng takot sa mga nagpuprotestang magbubukid. AB

Pagbasura, di pagrepaso sa VFA ang kailangan

PAGBABASURA at hindi pagrerepaso sa RP-US Visiting Forces Agreement (VFA) ang sigaw ng bayan, ayon sa mga progresibong kinatawan sa resolusyong iniharap nila noong Oktubre 26. Nilagdaan ito nina Rep. Teddy Casiño ng Bayan Muna, Rep. Rafael Mariano ng Anakpawis, Rep. Antonio Tinio ng ACT Teachers at Rep. Raymond Palatino ng Kabataan Partylist.

Binuo ni Benigno Aquino III noong Oktubre 1 ang Presidential Commission on the VFA. Pamumunuan ito ni Executive Sec. Paquito Ochoa Jr. at kasama niya bilang mga *co-chairman* sina Foreign Affairs Secretary Alberto Romulo at National Defense Secretary Voltaire Gazmin, na kilalang mga maka-imperyalistang US. Pinaabutan na umano ni Aquino si US Ambassador Harry Thomas Jr. sa pakay ng nasabing komisyon na repasuhin ang mga probisyon ng VFA, partikular sa usapin ng kustodiya ng mga nagkasalang sundalo ng US. Nasisiyahan naman daw ang embahador ng US, na nagbilang ng kung anu-anong mga biyayang naibigay na umano ng VFA sa Pilipinas.

Anang mga progresibong mam-

babatas, dapat tapusin na ang tagibang at makaisang panig na kasunduan na nilagdaan sa pagitan ng gubyrno ng Pilipinas at ng gubyrno ng US noong 1999. Bukod sa kanila, pursigido rin si Deputy Speaker Lorenzo Tañada III na mapawalang-bisa ang VFA. Gayundin ang hiling ng Senate Joint Resolution No. 3 na ihinain ni Sen. Miriam Defensor-Santiago, ang tagapangulo ng Legislative Oversight Committee on the VFA. Sangayon din dito si Sen. Francis Pangilinan na nagsabing pumapabor lamang ang naturang kasunduan sa mga Amerikano na hindi naman nagbabayad sa mga ispesyal na areglo sa kanilang pagbabase sa bansa.

Ayon naman kay Rep. Luz Ilagan ng Gabriela Women's Party, hindi totoong ayaw ni Aquino na maulit ang nangyari sa kaso ni US Marine Lance Corporal Daniel Smith. (Si Smith ay hinatulan ng Makati Regional Trial Court noong Disyembre 2006 na nagkasala sa panggagahasa sa isang Pilipina. Sa halip na makulong ito sa isang lokal na piitan ay inilipat ito sa US Embassy. Kalaunan ay pinawalang-sala si Smith ng Korte Suprema noong Abril 2009).

Sa kabila ng pag-utos ni Aquino na repasuhin ang VFA, siya ay kumikiling sa pagpapanatili ng mga tropang Amerikano sa bansa. Tinukoy ni Ilagan na sa unang pagbisita ni Aquino sa US, may dala ito pabalik sa bansa na \$2.8 bilyon sa anyo ng mga pamumuhunan, kabilang na ang \$434 milyon mula sa Millennium Challenge Corp. Kung mayroong ayudang ibinibigay ang US, tiyak na iyon ay may kapalit na mga kundisyon, anang kinatawan ng Gabriela Women's Party.

Ang VFA, na niratipika ng Senado noong Mayo 27, 1999 ay nagpahintulot sa pagpasok ng mga tropang Amerikano, mga barko degera at mga kagamitang militar nito at magtayo ng pansamantalang mga pasilidad militar saan mang bahagi ng bansa. Nitong Oktubre 14-22, umabot sa 4,000 sundalong Amerikano ang naglunsad ng pag-sasanay-militar sa Central Luzon sa ilalim ng Cooperation Afloat and Readiness Training (CARAT). Samantala, aabot na ngayon sa 700 tropang Amerikano ang pirmeng nakaistasyon sa loob ng Camp Navarro sa Zamboanga City at lumalahok sa mga operasyong pangkombat sa Basilan, Sulu at iba pang bahagi ng Mindanao. AB

Kaso ni Karen Vertido, binigyang-katarungan ng CEDAW

MATAPOS ang 14-taong pakikibaka, nakamit ni Karen Vertido ang katarungan sa dinanas niyang panggagahasa. Ito'y matapos maglabas ang United Nations Committee on the Elimination of All Forms of Discrimination Against Women (CEDAW) noong Hulyo 16 ng resolusyong nagrerekomenda sa guberno ng Pilipinas na bigyan siya ng karampatang danyos batay sa kabigatan ng mga paglabag sa kanyang mga karapatan.

Kinastigo ng CEDAW ang isang korte sa Davao City na nagbasura sa kasong panggagahasa na isinampa ng biktima laban sa maimpluwensyang negosyanteng si Jose Custodio. Si Vertido ay ginahasa ni Custodio sa isang motel noong Marso 29, 1996. Si Custodio noon ang presidente ng Davao City Chamber of Commerce (DCCC) habang si Vertido ang *executive director* nito. Nakulong ang negosyante ngunit pinalaya ito noong Abril 2005 nang ibasura ng hukuman ang kaso.

Idinulog ni Vertido ang kanyang kaso sa CEDAW sa tulong ng GABRIELA. Maaaring magdulog ng kaso sa CEDAW kung ubos na ang halos lahat ng mga daluyan at mga pamamaraan para maituwid ang kaapihang dinanas ng biktima. Ang kaso ni Vertido ang kauna-unahang kaso ng reyp na idinulog sa CEDAW mula sa Asia-Pacific. AB

Arroyo, tumanggap ng pinakamalaking *pork barrel*

TATANGGAP ng ₱2.2 bilyon pondo para umano sa imprastruktura si Rep. Gloria Arroyo para sa susunod na taon. Ito ang pinakamalaking *pork barrel* na tatanggapin ng sinumang kongresista.

Ang pondong tatanggapin ni Arroyo para sa ikalawang distrito ng Pampanga ay ilang ulit na mas malaki sa ₱200 milyong badyet ng Department of Public Works and Highways (DPWH) para sa buong prubinsya ng Pampanga. Ang inilaang pondo na ito para kay Arroyo ay katumbas ng pautang mula sa Japan Bank for International Cooperation at Korean Development and Cooperation Fund para sa mga proyekto sa naturang distrito. Inareglo ni Arroyo ang utang na ito noong presidente pa siya. Bukod pa ito sa ₱70 milyon *pork barrel* na tatanggapin niya taun-taon tulad ng minimum na tinatanggap ng bawat kongresista.

Umani ng pagbatikos si Benigno Aquino III sa pagkunsinti sa napakalaking *pork barrel* ni Arroyo. Ayon sa Malacañang, di ito dapat ituring na tulad ng karaniwang *pork barrel* dahil galing sa mga utang sa ibang bansa ang alokasyon. Isinaisantabi ng mga tagapagsalita ni Aquino na noong presidente pa si Arroyo, ginamit niya ang kanyang kapangyarihan sa pagkopo ng gayong malalaking ayuda at utang mula sa ibang bansa para sa kanyang distrito bilang paghahanda sa pagtakbo bilang kongresista.

Ang pagtatanggol pa ngayon kay Arroyo ay pagbaling mula sa dating pagbatikos ni Aquino kay Arroyo sa manipulasyon nito sa mga pondo ng guberno para sa sariling kapakanan, kabilang na ang milyun-milyong pondong pangkalamidad na ikinonsentra niya sa sariling distrito. Sa halip na gamiting pantulong sa mamayan sa panahon ng malalaking kalamidad ay inilabas na lamang ito noong panahon ng eleksyon (pitong buwan makaraan ang matitinding bagyong Ondoy at Pepeng).

Ang malambot ngayong pagtrato ni Aquino kay Arroyo ay bahagi pa ng kasunduang itinaguyod ng US noon pang panahon ng eleksyon para sa mapayapang pagkakasundo ng magkalabang reaksyunaryong kampo. AB

Mga dokumento ng gera sa Iraq, isinapubliko ng Wikileaks

NITONG Oktubre, inilagay ng *Wikileaks* sa *website* nito ang 400,000 sikretong dokumentong nagdedetalye sa panggegera ng US sa Iraq.

Ipinakikita sa mga dokumento ang pagkamatay ng umaabot sa 109,000 katao nang dahil sa panghihimasok ng US sa Iraq, kabilang ang 66,000 sibilyan. Mas marami ito nang 15,000 sa dating naiulat na bilang ng mga sibilyang nasawi.

Naunang inilabas ng *Wikileaks* ang 700,000 sikretong mga doku-

mento ng gera ng US sa Afghanistan noong unang bahagi ng taon.

Kabilang sa mga dokumentong inilabas ng *Wikileaks* ang mga ulat hinggil sa tortyur, pamamaslang at krimen sa digma. Ipinakikita rin sa mga dokumento ang mga ulat ng panggagahasa, pang-aabuso, tortyur at pamamaslang na isinasagawa ng mga papet na pulis at sundalo sa mga sibilyang Iraqi. Ang mga insidenteng ito ay hindi man lamang inimbestigahan ng US.

Samantala, nanawagan sa US si Manfred Nowak, *special rapporteur* ng United Nations hinggil sa tortyur, na imbestigahan ang pagkakasangkot ng mga pwersang militar ng US sa pang-aabuso sa karapatang-tao sa Iraq. Aniya, ang mga kasong ibinunyag ng *Wikileaks* ay tumutukoy sa malilina na paglabag sa UN Convention Against Torture, at may obligasyon ang administrasyong Obama na imbestigahan ang mga ito. AB

**ANG****Bayan**

Pahayagan ng Partido Komunista ng Pilipinas
Pinapatnubayan ng Marxismo-Leninismo-Maoismo

Taon XLI Blg. 21
Nobyembre 7, 2010
www.philippinerevolution.net

Editorial

Baklasin ang mga balakid sa usapang pangkapayapaan

Apat na buwan mula nang maluklok ito, nabuo na rin ng rehimeng Aquino ang panel para sa pakikipag-usapang kapayapaan sa National Democratic Front of the Philippines (NDFP). Kabilang sa hinirang ni Aquino ang mga personaheng kinikilalang tunay na interesado sa prosesong pangkapayapaan.

Ito na ang unang positibong hakbang tungo sa muling pagbubukas ng matagal nang nauntol at nabahurang usapan. Sa kabilang panig, ilang buwan na mula nang ipahayag ng NDFP ang kahandaan nitong harapin sa usapang pangkapayapaan ang rehimeng Aquino oras na magpakita ito ng kaseryosohan dito.

Inaasahang muling masisimulan ang mga pag-uusap sa bungad ng 2011.

Subalit higit pa ang mga hamon sa pagtutol ng usapang pangkapayapaan. Marami pang dapat ayusin para umusad ito nang maayos. Pangunahin dito ang pangangailangang alisin ng GRP ang mga itinayo nitong balakid na sumasagka sa muling pagbubukas ng pormal na pag-uusap.


Higit sa paghirang ng kanyang mga sugo, kailangang ipakita ni Aquino ang kaseryosohan sa pag-uusap sa pamamagitan ng pagtataguyod at paggalang sa mga dati nang

kasunduang pinirmahan ng NDFP at GRP. Dapat niyang pawiin ang lahat ng mga naging hakbang ng dating rehimen na naging mapangwasak sa usapang pangkapayapaan.

Dapat kilalanin at mahigpit na itaguyod ang Joint Agreement on Safety and Immunity Guarantees (JASIG) na siyang nagbibigay-proteksyon sa mga konsultant at istap ng magkabilang panig na sangkot sa negosasyon. Makailang ulit itong nilapastangan ng rehimeng Arroyo sa pag-atake sa mga konsultant at istap ng NDFP.

Humihingi ng katarungan ang mga kaso ng pagdukot sa mga tauhan ng NDFP na sina Leo Velasco, Prudencio Calubid at Rogelio Calubad at iba pa. Dapat nang agad mapalaya ang anim pang nakakulong. Ang mandamyento de aresto laban kina Ka Luis Jalandoni, tagapangulo ng *negotiating panel* ng NDFP at Ka Jose Ma. Sison, punong pampulitikang konsultant ng NDFP at iba pang sinampahan ng gawa-gawang mga kasong kriminal ay nakasagka sa malaya nilang paglahok sa usapang pangkapayapaan.

Hangga't walang malinaw na pahayag ang GRP tungkol sa pagtatalima nito sa JASIG, nasa alanganin ang planong pag-uwi sa



Mga tampok sa isyung ito...

Sabwatang Akbayan at rehimeng US-Aquino
PAHINA 3

Pagtutol sa pagmimina, lumalawak
PAHINA 7

Pagpapatanim ng kasaba ng Cojuangco-SMC
PAHINA 8